

Cumegn da Surses



**Lescha da pulizeia
(LPul)**

Register

	Pagina
I. Disposiziuns generalas	
Art. 1 - Camp d'applicaziun e scopo	4
Art. 2 - Cumpetenzza	4
Art. 3 - Pulizeia communal	4
Art. 4 - Identitad e legitimaziun	4
Art. 5 - Impedimaint dalla lavour dalla pulizeia	4
II. Prancepis digl ager dalla pulizeia	
Art. 6 - Legalitad e proporziunalitad	5
Art. 7 - Clausula generala da pulizeia	5
Art. 8 - Adressats digl ager dalla pulizeia	5
Art. 9 - Stadi d'urgenza pulizial	5
III. Siertad publica scu er pôss ed urden	
A. Taragn public	5
Art. 10 - Utilisaziun digl taragn public (diever public intensiv)	5
Art. 11 - Relaziun tranter parcelas publicas e privatas	6
Art. 12 - Campar	6
Art. 13 - Zonas libras da substanzas tgi fon dependent	6
Art. 14 - Tschuffargneda da possess public	6
Art. 15 - Lavours ve da vehichels ed utensils	6
B. Siertad publica	6
Art. 16 - Prancepi	6
Art. 17 - Sierar edifezis ed implants	7
Art. 18 - Allontanar indrezs da protecziun	7
Art. 19 - Rumageda da neiv	7
C. Canera ed otras immissiuns	7
Art. 20 - Deis da pôss	7
Art. 21 - Taimps da pôss	7
Art. 22 - Otpledaders e sistems d'alarm acustics or agl liber	8
Art. 23 - Fis artificial, oters objects pirotecnics e gliternas sgulontas	8
Art. 24 - Sagettar	8
Art. 25 - Immissiuns da gleisch	8
Art. 26 - Vehichels, urdegns e maschinas ord adiever	8
D. Tigneida d'animals	8
Art. 27 - Prancepi	8
Art. 28 - Annunztga da tgangs	9
Art. 29 - Tigneir tgangs ainten la publicitad	9
IV. Prescripziuns stradalas, parcar sen parcadis publics	
Art. 30 - Cumpetenzas dalla suprastanza communal	9
Art. 31 - Parcar sen taragn public	9
V. Disposiziuns penalas	
Art. 32 - Disposiziuns penalas	10
Art. 33 - Procedura da multa disciplinara	10

VI. Lubientschas, taxas e disposiziuns finalas

Art. 34 - Lubientschas	10
Art. 35 - Taxas	11
Art. 36 - Disposiziuns executivas	11
Art. 37 - Meds legals	11
Art. 38 - Eliminaziun da situaziuns illegalas	11
Art. 39 - Annullaziun digl dretg vertent	11
Art. 40 - Antrada an vigour	11

La lescha preschainta sa basa agl art. 3 alinea 3 dalla constituziun communal, art. 79 dalla constituziun digl cantun Grischun (CC; DG 110.100), art. 3 dalla lescha da pulizeia digl cantun Grischun (LPol; DG 613.000), art. 2 alinea 2 dalla lescha davart igls fatgs veterinars (LVet; DG 914.000) ed art. 7 dalla lescha introductiva tar la lescha federala davart igl traffic sen veia (LIltLV; DG 870.100).

Denominaziuns da persungas, funcziuns e professiuns ainten chesta lescha sa refereschan a tot las schlattagnas, schinavant tgi sa resulta navot oter digl senn dalla lescha.

I. Disposiziuns generalas

Art. 1 Camp d'applicaziun e scopo

¹ Chesta lescha regla la siertad da persungas ed animals, la protecziun digl ambiaint e digl possess cunter donnagedas e prievels da tot gener e duess mantigneir la chietezza ed igl urden public segl territori digl cumegn da Surses. Ella cumplettescha la legislaziun federala e cantunala, schinavant tgi chegl è la tgossa digl cumegn.

² La legislaziun surordinada (federala e cantunala) resta reservada.

³ Reservadas restan pinavant ulteriouras leschas ed ordinaziuns digl dretg communal cun character pulizial (lescha da biagier; lescha d'ustareia; lescha davart igls deis da pôss publics; lescha da carar sen veias da fons, prada, gôt ed alps cun vehichels a motor; lescha d'alps, pastgiras e prada; lescha davart l'economia da rusment etc.).

Art. 2 Cumpetenzza

La suprastanza communal è l'autorità da pulizeia suprema. Ella pò delegar l'execuziun u singuls pensums ad ampluias comunals u ad otras instanzas adattadas publicas u privatas.

Art. 3 Pulizeia communal

¹ La suprastanza communal regla l'organisaziun dalla pulizeia communal resp. digls ampluias comunals ed organs incaricos cun funcziuns pulizialas.

² La pulizeia communal ò surtot las incumbensas suandontas:

- a) da procurar per chietezza, urden e siertad;
- b) da survegilar igl vehichels parcos;
- c) d'adampleir ulteriouras incumbensas pulizialas tgi èn neidas surdadas ad ella antras la legislaziun communal.

Art. 4 Identità e legitimaziun

¹ Igl pulicist communal u oters ampluias comunals u organs incaricos dalla suprastanza communal cun incumbensas executivas èn autorisos an cass mutivos da constatar l'identità d'ena persunga.

² Igl ampluias comunals ed igls organs autorisos d'exequir ena funcziun da pulizeia uffiziala on da s'identifigier a caschung da funcziuns uffizialas sainza tgi chegl vign giavischia, schinavant tgi las circumstanças permettàn chegl.

Art. 5 Impedimaint dalla lavour puliziala

Igl impedimaint u disturbi dalla lavour puliziala pò neir punia. Castieidas vignan er persungas tgi fon an ena moda u l'otra ancunter agl cumond digl pulicist communal u d'en oter ampluia communal cun dueirs pulizials.

II. Prancepis digl ager dalla pulizeia

Art. 6 Legalitad e proporziunalitad

¹ Per adampleir lour pensums èn las persungas ed igls organs tg'èn incaricos cun incumbensas executivas da pulizeia liias ve dalla constituziun e la lescha.

² Stattan ples maseiras adattadas a disposiziun per contanscher en scopo pulizial, stò neir tscharneida chella tgi fò previsiblamaintg igl pi pac donn allas persungas singulas ed alla publicitad.

Art. 7 Clausula generala da pulizeia

Aint igl cass singul peglian las persungas ed igl organs tg'èn incaricos cun incumbensas executivas da pulizeia maseiras urgentas er sainza ena basa legala speziala, per previgneir u impedeir prievels serious directamaintg smanatschonts u disturbis effectivs dalla siertad publica e digl urden public.

Art. 8 Adressats digl ager dalla pulizeia

¹ Igl ager dalla pulizeia sa drezza cunter chella persunga tgi disturba u periclitescha directamaintg la siertad publica ed igl urden public cun igl sies agen cumportamaint u cun igl cumportamaint da terzas persungas, per las qualas ella è responsabla.

² Schi en animal u ena tgossa disturba u periclitescha directamaintg la siertad publica ed igl urden public, sa drezza igl ager dalla pulizeia a chella persunga tgi ò scu proprietaria u ord en oter muteiv la cumpetenzza effectiva da disponer digl animal u dalla tgossa.

Art. 9 Stadi d'urgenza pulizial

Excepziunalmaintg pò igl ager dalla pulizeia sa drizzar cunter otras persungas tgi n'èn betg participadas, schi igl madem mument

- a) ins stò impedeir en grond disturbi u en priewel considerabel tgi smanatscha directamaintg la siertad publica ed igl urden public;
- b) maseiras cunter disturbaders tenor art. 7 na son betg neir pigleidas ad ouras u n'èn betg ampurmattontas;
- c) las persungas pertutgeidas pon neir occupadas sainza periclitaziun considerabla d'ellas sezzas e sainza surpassar bagns giuridics pi ots.

III. Siertad publica scu er pôss ed urden

A. Taragn public

Art. 10 Utilisaziun da taragn public (diever public intensiv)

¹ Mintga utilisaziun da taragn public e da tgossas publicas tgi surpassa igl adiever general dovra ena lubientscha digl cumegn. Chegl vala an spezial per:

- a) manar tras manifestaziuns, tils ed occurrenzas da festas;
- b) installar stands mobils, indrezs d'infurmaziun e da reclama;
- c) offereir tgossas e prestaziuns da sarvetsch cun intent da gudogn;
- d) far propaganda per organisaziuns cun u sainza intent commercial (offereir prestaziuns da sarvetsch u recrutar novs commembers);
- e) far art, musica u cant sen veia.

² Per igl adiever da taragn public u d'objects publics cun excluder otras persungas cun dretg d'utilisaziun dovrigl ena concessiun.

³ Affischas e placats sen taragn public èn lubias angal cun ena lubientscha digl cumegn.

⁴ Placats e publicaziuns tgi cunterfon alla morala e maniera èn scumandos.

⁵ La suprastanza communal decide davart la concessiun da chellas lubientschas.

⁶ L'utilisaziun da taragn public an connex cun projects da construcziun sa drezza tenor las disposiziuns dalla lescha da biagier digl cumegn da Surses.

Art. 11 Relaziun tranter parcelas publicas e privatas

¹ L'utilisaziun da parcelas privatas tgi cunfineschan cun taragn public na dastga ni restranscher ni periclitare igl adiever digl taragn public.

² Chella prescripziun vala er schi existan dretgs publics da passar a pe e cun vehichels sur parcelas privatas.

Art. 12 Campar

¹ Igl è scumando da campar an tendas, autos-rullotta etc. scu er da staziunar permanentamaintg rullottas ed autos-rullotta nunabitos sen taragn public.

² Exclus da chel scumond è igl campar an zonas cun adiever da campadi lubia (zona da campar). La suprastanza communal pò lubeir ulteriouras excepziuns per campar an lis definias expressivamaintg persiva.

Art. 13 Zonas libras da drogas

¹ Igl consum d'alcohol, nicotin, drogas u otras substanzas tgi fon dependent è scumando sen igls areals da scola e da scoletta. Sen dumonda decide la direcziun digl cumegn davart regulaziuns d'excepziun a caschung d'occurrências. La suprastanza communal pò lubeir ulteriouras excepziuns per en taimp limito, chegl an cass da muteivs impurtants. Las zonas libras da drogas ston neir marcadas correspondentamaintg.

² Sen las plazzas da giuier tgi appartignan agl cumegn scu er aint igls implants da taimp liber e da sport or agl liber, pò la suprastanza communal determinar zonas libras da drogas permanentas u temporaras.

Art. 14 Tschuffargneda da possess public

¹ Igl è scumando da tschuffargner u da midar possess public, an spezial:

- a) da pattar u lascher starnia rusment da tot gener sen taragn public;
- b) da far igl sies dabasigns sen taragn public aint igl territori abito u an en li visibel dalla publicitad.

² Mintga tschuffargneda caschunada stò neir messa immediatamaintg an urden. Na dat igl caschunader betg suatientscha a chell'obligaziun malgro igl cumonda digl cumegn, vignan mess a chint igls costs per la nattageda agl caschunader.

Art. 15 Lavours ve da vehichels ed urdegns

Igl è scumando da far lavours ve da vehichels, maschinas ed urdegns sen igl taragn public. Exclusas èn reparaturas urgentas. Schi fò basigns ègl da piglier maseiras ancunter canera e contaminaziun.

B. Siertad publica

Art. 16 Prancepi

Tot las acziuns tgi son periclitare la siertad e sanadad da persungas ed animals u la siertad d'objects èn d'evitar.

Art. 17 Sierar edifezis ed implants

¹ Proprietaris, fittadigns scu er abitants dad implants, edifezis e singulas stanzas on da procurar tgi na sa distatgan nignas parts d'edifezis e seivs u objects e crodan sen plazs, veias, sendas ed indrezs accessibels publicamaintg. Igl è da procurar cunzont tgi objects tgi stattan davant fanestras u sen terrassas da tetgs e sen tetgs seian sieras suffiziamaintg.

² Foss, tumbigns, collectours, puschnignas ed oters burals aint igl taratsch ègl da cuvreur da moda sieira respectivamaintg da barricadar e signalisar, uscheia tgi dat nign priewel d'accident.

Art. 18 Allontanar indrezs da protecziun

Igl è scumando da scuvreir da levsenn cuvreidas digl taragn, collectours, foss e tgossas sumigliaintas scu er da schlucrar, midar ed allontanar piogns, viertgels da hidrants e da tumbigns, barrieras da construcziun ed oters indrezs da protecziun.

Art. 19 Rumageda da neiv

¹ Ins na dastga betg pattar la neiv giu da tetgs, terrassas, plazs e veias lateralas sen veias publicas, plazs u passapes.

² Excepziuns èn lubeidas an cass da navaglias cun risguardar las cundiziuns suandontas davart digls proprietaris da taragn:

- a) igl traffic da vehichels e da pedunzs stò neir reglo;
- b) la neiv pattada giu stò neir allontanada immediatamaintg ad agen chint.

³ Igl tetgs da tgesas situadas dasper las veias publicas on da neir munias cun lattas da tetg u oters indrezs tgi tignan anavos la neiv.

C. Canera ed otras immissiuns

Art. 20 Deis da pôss

La protecziun digl pôss public durant las dumengias ed igls firos uffizials è reglada ainten la lescha communal davart igls deis da pôss uffizials scu er ainten la legislaziun surordinada.

Art. 21 Taimps da pôss

Schinavant tg'igls artetgels suandonts na cuntignan nignas regulaziuns spezialas, vala igl suandont:

- a) Igl pôss dalla notg cozza dall'antschatta november anfignen la fegn d'avregl dallas 22:00 allas 07:00 e dall'antschatta matg anfignen la fegn d'otgover dallas 23:00 allas 07:00.
- b) Durant igl pôss dalla notg ègl d'evitar totta sort canera tgi disturba la chietezza u la sien. Scumandadas or agl liber èn surtot las activitads suandontas: cantar, far musica, discorrer dad ot, sbrigeir, sgrignier ed activitads sumigliaintas; igl adiever d'apparats da reproducziun da tungs, megafons, sirenas ed apparats sumigliaints; tibar sainza basigns e canera da vehichels evitabel; lavar autos, maschinas e tgossas sumigliaintas.
- c) Durant igl ulteriour taimp na dastgan terzas persungas betg neir mulestadas da maniera intolerabla antras tal cumportamaint.
- d) Tranter las 12:00 e las 13:00 ed a parteir dallas 20:00 anfignen tgi antscheva igl pôss dalla notg ègl da risguardar igl basigns da chietezza dalla populaziun. Durant igl ulteriour taimp ègl da tralascher tot igls disturbis exageros tgi son neir evitos cun piglier maseiras raschunevlas u cun en cumportamaint cun respect. Lavours tgi fon canera on da neir fatgas tenor pussebladad ainten stanzas saradas.
- e) Activitads aint igl intern d'edifezis na dastgan betg disturbar terzas persungas a moda intolerabla; surtot durant igls taimps da pôss tenor punct a) ègl da tigneir saro ischs e fanestras.

- f) Gestionarîs da locals ed implants cun preschientscha da public èn obliias da piglier tot las maseiras necessarias (admoneir, tarmetter davent persungas, angascher temporarmaintg sarvetschs d'urden privats schi fò basigns etc.), per tg'igls visitaders fetschan nigna canera nunnecessaria oravant ed aint igls locals sen lour taragn privat.
- g) L'autorità tgi conceda la permissiun pò obliier igls gestionarîs da locals ed implants scu er igls organisatours d'evenimaints e d'occurrènzas d'incaricar ad agen chint en sarvetsch d'urden privat tgi dispona dallas qualificaziuns basignevas. Las persungas tgi prestan chel sarvetsch ston neir annunztgeidas agl cumegn cun las persunalias.

³ La suprastanza communal pò lubeir excepziuns per singuls evenimaints e singulas occurrènzas.

Art. 22 Otpledaders e systems d'alarm acustics or agl liber

¹ Per l'installaziun e la gestiun d'indrezs d'otpledaders u systems d'alarm acustics sot tschiel avert, ainten tendas da festa u ainten construcziuns moviblas dovrigl ena lubientscha. Chegl vala er per indrezs cun en effect tgi vo digls edifezis anor agl liber.

² Chellas prescripziuns na valan betg per las organisaziuns d'intervenziun d'urgenza e per igls meds da transport publics.

Art. 23 Fis artificials, oters objects pirotecnics e gliternas sgulontas

¹ Per proteger animals, persungas ed ambiaint ègl scumando da far arder petardas, fis artificials ed oters objects pirotecnics scu er da lascher sglar gliternas sgulontas sen igl territori da cumegn.

² Exclus digl scumond èn

- a) fis artificials tgi na caschungan nigns effects da canera spezials, scu fis artificials da meisa, candeilas magicas, fis bengals, gleichs romanas, vulcans e tizungs;
- b) igl sagettar granatas da murter u tgossas sumigliaintas ord tradiziun a caschung da firos religious locals.

³ Resalvadas èn restricziuns ord muteivs dalla pulizeia da fi u oters muteivs dalla siertad publica.

Art. 24 Sagettar

Igl è lubia da sagettar cun armas sulettamaintg ainten indrezs determinos per chel scopo. Resalvadas èn las prescripziuns spezialas pertutgont la tgatscha ed exerchezis militars.

Art. 25 Immissiuns da gleisch

¹ La suprastanza communal pò restranscher u scumandar immissiuns da gleisch tgi disturban.

² Radis da lasers u otras influenzas da gleisch tgi meidan igl maletg dalla cuntrada u digl tschiel nocturn èn scumandos an general.

Art. 26 Vehichels, urdegns e maschinas ord adiever

Per vehichels ord adiever tgi na vignan alla lunga betg ple utilisos conform a lour intent, valan las determinaziuns respectivas dall'ordinaziun cantunala davart la protecziun digl ambiaint. Igl madem vala er per urdegns e maschinas ord adiever.

D. Tigneida d'animals

Art. 27 Prancepi

Animals on da neir tignias uscheia tgi ni carstgangs ni animals ni objects vignan periclitos u subeschan en donn u vignan mulestos a moda intolerabla perveia d'influenzas (canera, odours etc.).

Art. 28 Obligaziun d'annunztgier tgangs

¹ Mintga tgang tgi vign tignia aint igl cumegn stò neir annunztgia digl possessour agls sarvetschs d'abitants. L'obligaziun d'annunztgier antscheva pi spert tg'en tgang ò treis meis.

² Mintga midada da possessour scu er la mort da tgangs stò neir annunztgeida agls sarvetschs d'abitants ainfer 10 deis.

Art. 29 Tigneir tgangs ainten la publiciad

¹ Igl è scumando da lascher liber igls tgangs sainza survegiazium.

² Igl è scumando da piglier tgangs e giats ainten baselgias e sen santieris. Exclud da chel scumond èn tgangs da guida e d'assistenza.

³ Ainten edifezis dall'administraziun communal ed ainten edifezis polivalents comunals, sen areals da scola e scoletta, plazzas da giuier, implants da sport e da taimp liber, sen plazzas publicas scu er ainten zonas da pôss per selvaschigna ègl da tigneir igls tgangs alla tschinta curta. La suprastanza communal pò determinar ulteriours lis, noua tg'igls tgangs ston neir tignias alla tschinta.

⁴ Igls possessours da tgangs procuran tgi er ordvart igls territoris numnos na vignan ni carstgangs ni animals periclitos u mulestos a nigra moda e maniera digls tgangs.

⁵ Chel tgi tigna u magna en tgang ò da procurar tg'igls excremants da chel sen taragn public e taragn da terzas persungas vigna dismiss immediatamaintg e conform agl urden aint igls recipiants per excremants da tgangs correspondents.

⁶ La suprastanza communal pò lascher tgappar tgangs tgi giran sainza survegiazium u tgangs tgi na son betg neir identifitgias. Scu tgangs tgi giran, valan tgangs tgi von anturn sainza patrung durant ples ouras da de u da notg. Ègl nign tgi reiva per els an terma da treis deis cun paer igls costs, pò igl cumegn disponer dad els.

IV. Ordinaziuns da traffic, parcar sen parcadis publics

Art. 30 Cumpetenzas dalla suprastanza communal

¹ Schinavant tg'igl dretg surordino prevei navot oter, è la suprastanza communal responsabla per la regulaziun e signalisaziun digl traffic local scu er per ulteriouras maseiras dalla pulizeia da traffic.

² Cun resalva dallas prescripziuns respectivas federalas e cantunalas ò la suprastanza communal spezialmaintg las cumpetenzas suandontas:

- a) relascher scumonds da carar e da tgavalger per singulas veias e plazzas scu er defineir veias a direcziun unica;
- b) defineir veias da velos e veias da tgavalger;
- c) relascher zonas da parcar incl. determinar restricziuns a taimp limito, urden da plazzamaint etc.;
- d) introduceir e determinar l'obligaziun da taxas per l'utilisaziun digls parcadis;
- e) decider davart igl plazzamaint da scumonds da farmar e da parcar;
- f) reglar igl traffic cun amplas u oters cundrezs;
- g) ordinar maseiras spezialas per reglar igl traffic an connex cun lavours da construcziun, occurrenzas etc.

Art. 31 Parcar sen taragn public

¹ Igl è da prancepi scumando da parcar e deponer vehichels sen taragn public.

² Sen taragn public ègl lubia da parcar vehichels angal sen igls parcadis tg'en signalisos e marcos per chel scopo.

³ Vehichels on da neir allontanos dallas veias publicas e digls parcadis publics schi chels èn deponias a moda irregulara, schi impedeschan igl traffic u schi savessan grevager la rumageda da neiv planisada.

⁴ Igl è scumando da deponer vehichels a motor betg immatriculoss, maschinas ed urdegns, scu er da lavar e far lavours da mantignamaint sen taragn public. Exclusas èn reparaturas urgentas. Schi fò basigns ègl da piglier maseiras da protecziun ancunter canera e contaminaziun.

V. Disposiziuns penelas

Art. 32 Disposiziuns penelas

¹ Cuntradiziuns cunter chella lescha e cunter disposiziuns relaschedas a basa da chella vignan puneidas dalla suprastanza communal aint igl rom dalla procedura penala administrativa ordinaria tenor las disposiziuns relativas dalla procedura penala cantunala cun ena multa d'anfignen CHF 10'000.00.

² Resalvadas restan an tot igls cass las disposiziuns penelas digl dretg cantunal e federal.

Art. 33 Procedura da multa disciplinara

¹ Cuntradiziuns cunter chella lescha scu er cunter igls artetgels 36c, 36g, 36h e 36j dalla lescha da pulizeia digl cantun Grischun vignan puneidas digl cumegn per regla aint igl rom d'ena procedura da multa disciplinara. Per la fixaziun dalla multa disciplinara na vignan betg risguardadas ni la veta precedentia ni las relaziuns persunalas. Cun igl paiamaint dalla multa disciplinara ainfer 30 deis aintra chella an vigour legala.

² La suprastanza communal relascha ena glista cun surpassamaints tgi pon neir punias cun multas disciplinaras d'anfignen CHF 500.00. Ella fixescha igl import dalla multa e denominescha igls organs communsals tg'èn autorisos d'incassar la multa.

³ An cass da cuntravenziuns cunter disposiziuns penelas communalas on igls organs da pulizeia digl cumegn denominos dalla suprastanza communal igl dretg d'incassar segl li e cunter retschaveida las multas disciplinaras tenor alinea 2. Chegl schi els on observo sezs la cuntravenziun, sch'igl fatg è evident ord vista giuridica ed effectiva e schi la persunga pertutgeida rancanoscha igl fatg.

⁴ Igl pertutgia ò igl dretg da refusar la procedura da multa disciplinara an terma da 30 deis siva dall'avertura dalla procedura. Refusescha el chella an terma digls 30 deis tenor alinea 1 u na vign la multa betg paeda an chel taimp, dattigl ena denunztga alla suprastanza communal. Chella decida alloura davart ena multa eventuala aint igl rom dalla procedura penala administrativa ordinaria. An chel connex n'è la suprastanza betg lieida ve dalla glista da multas.

⁵ An cass tgi ena persunga sainza dimora an Svizra na paia betg dalunga la multa, stò ella deponer igl import u prestar en'otra siertad commensurada.

VI. Lubientschas, taxas e disposiziuns finalas

Art. 34 Lubientschas

¹ Dumondas per survagneir las lubientschas tenor la lescha preschainta ston neir inoltradas per regla aglmanc dus emdas davantor.

² La concessiun d'ena lubientscha cundiziunescha tg'igls criteris persunals ed igls criteris digl fatg seian adamplias, scu er la garanzeia tgi chella na s'oppona ni ad interess publics ni privats predominants.

³ Schi las premissas per survagneir la lubientscha vessan da scrudar posteriourmaintg u schi las obligaziuns e cundiziuns tgi èn colliedas cun la lubientscha na vignan betg observadas, pò la lubientscha neir retratga.

Art. 35 Taxas

¹ Per disposiziuns a basa da chella lescha vignan incassadas per regla taxas da CHF 50.00 anfignen CHF 300.00. Per proceduras estendeidas u an cass da difficultads spezialas monta la taxa maximala a CHF 1'000.00.

² Las taxas vignan incassadas a basa dallas taxas da canzleia tgi vignan fixadas mintg'onn.

³ Expensas per prestaziuns da terzas persungas scu expertisas basignevlas u cunsegliaziun necessaria antras experts externs scu er expensas necessarias an daner blot vignan mess a chint separadamaintg.

Art. 36 Disposiziuns executivas

La suprastanza communal pò relascher disposiziuns executivas per l'execuziun da chella lescha.

Art. 37 Meds legals

Tot las decisiuns e disposiziuns digl organs comunals autorisos pon neir contestadas an terma da 20 deis cun recurs administrativ an scretg e mutivo alla suprastanza communal.

Art. 38 Eliminaziun da situaziuns illegalas

¹ Schi gl'è d'eliminar ena situaziun cuntradictorica allas prescripziuns, alloura fixescha la suprastanza communal en termin commensuro per restaurar la situaziun legala, schinavant tgi gl'è betg basigns d'ena intervenziun immediata.

² Schi na vign betg do suatientscha ad ouras a chella disposiziun, pò la suprastanza communal piglier maseiras a chint dalla persunga culpevla u lascher exequeir da terzas persungas scu er instradar ena procedura da multa.

Art. 39 Annullaziun digl dretg vertent

¹ Cun l'antrada an vigour dalla lescha preschainta vignan annulladas tot las disposiziuns digls cumegn uriunds tgi stattan an cuntradicziun cun chella.

² An cass da cuntradicziuns cun oters decrets comunals an vigour digl cumegn da Surses, ò la lescha da pulizeia preschainta la preferientscha.

Art. 40 Antrada an vigour

La lescha preschainta vo an vigour cun la data digl conclus antras la radunanza communal.

Approvo dalla radunanza communal digls

Per la suprastanza digl cumegn da Surses

Igl mastral:

Igl scrivant da cumegn:

.....
Daniel Wasescha

.....
Beat Jenal